

आकाशवाणी जयपुर-अजमेर

प्रादेशिक समाचार

- केन्द्रीय गृहमंत्री अमित शाह कह्यो-देश मांय आंतरिक सुरक्षा बणायी राखण मांय सशस्त्र बलां रो खास योगदान।
- मुख्यमंत्री भजनलाल शर्मा पोकरण मांय सूरज री रोशनी ऊं 975 मेगावाट बिजली बणावण रा प्लांट रो उद्घाटन कीनो।
- सुप्रीम कोर्ट वक्फ संशोधन कानून, 2025 माथे केन्द्र सरकार ऊं सात दिन मांय जवाब तलब कीनो-मामला मांय आगली सुणवाई 5 मई ने व्हेला।

अर

- जोधपुर अर बीकानेर संभाग मांय जोरदार गर्मी अर लू ऊं जिन्दगी माथे असर पड़्यो-भरतपुर अर झालावाड़ समेत कठे-कठे हल्की बारिश ऊं थोड़ी साता मिली।

000

केन्द्रीय गृह मंत्री अमित शाह कह्यो है के हिफाजती दस्तां रा सदस्यां रा त्याग, तप अर बलिदान रे कारण म्हां हिफाजत सागे रह सक रह्या हां। वे आज सिरोही जिला रा आबू रोड़ मांय ब्रह्मकुमारी संस्थान रा मुख्यालय मांय राख्यी ज्या हिफाजती दस्तां ऊं जुड़्या कार्यक्रम मांय बोल रह्या हा। गृह मंत्री कह्यो के सुरक्षा बल बर्फीली वादियां अर तपता रेगिस्तान मांय जिंदगी रा बेहतरीन बगत दे र म्हाणी हिफाजत करे है। वे कह्यो के फौज अर अर्द्धसैनिक बलां रा जवानां सागे ई राज्यां री पुलिस ई अंदरूनी हिफाजत बणायी राखण मांय खास योगदान देवे है।

-----

श्री शाह कह्यो है के दुनिया ने सब ऊं पैली भारत वसुधैव कुटुंबकम रो संदेश दीनो। गृह मंत्री कह्यो के योग अर आध्यात्म ऊं मन, शरीर, बुद्धि अर आत्मा ने एक रूप कर र ज्ञान रे जरिये प्रगति रा गेला माथे चालण री भारत री जूनी रीत है अर म्हाणो देश ई रीत ने पूरी दुनिया मांय पूगावण री कोशिश कर रह्यो है। वे कह्यो के प्रधानमंत्री मोदी 21 जून ने अंतर्राष्ट्रीय योग दिवस मनावण रो आह्वान कर र योग री म्हाणी वैदिक परंपरा अर धरोहर ने पूरी दुनिया ताई पूगावण री कोशिश कीनी है। ब्रह्मकुमारी संस्थान रा काम री सराहवणा करता थकां गृह मंत्री कह्यो के ओ संस्थान त्याग, तपस्या अर तेज ऊं दुनिया मांय सादगी, संयम अर मदद रो अनोखो वातावरण बणावण रो काम कीनो है। कार्यक्रम मांय मुख्यमंत्री भजन लाल शर्मा ई विचार बताया।

000

मुख्यमंत्री भजनलाल शर्मा कह्यो है के राजस्थान सौर अर अक्षय ऊर्जा पैदा करण रा हलका मांय देश मांय अव्वल है। श्री शर्मा आज जैसलमेर जिला रा पोकरण मांय एक गैर सरकारी कंपनी री सूरज री रोशनी ऊं बिजली बणावण री 975 मेगावाट बूता री मशीनां रा उद्घाटन जळसा मांय बोल रह्या हा। मुख्यमंत्री कह्यो के राज्य सरकार 4 हजार 895 मेगावॉट बूता री परम्परागत अर 41 हजार 883 मेगावॉट अक्षय ऊर्जा परियोजनावां रा काम ने अढ़ाई लाख करोड रुपया रा निवेश ऊं आगे बढायो जावेला। ई मौके श्री शर्मा कह्यो के राजस्थान नवीकरणीय ऊर्जा पैदा करण रा 500 गीगावॉट बूता रो लक्ष्य हासिल करण मांय खास काम करेला।

वे कह्यो के प्रदेश मांय एके पाछे एक सरू व्हे रही सौर अर पवन ऊर्जा री परियोजनावां राज्य ने बिजली बणावण रा मामला मांय खुद रे पाण ऊबो करण मांय खास काम करेला। आज सरू करी

ज्यो परियोजना रो जिक्र करता थकां मुख्यमंत्री कह्यो के ई परियोजना ऊं बिजली कंपनियां ने सस्ती बिजली मिलेला, बिजली रा परंपरागत तरीकां माथे निर्भरता कम व्हेला अर जनता ने नौकरी-धंधा रा मौका मिलेला।

-----

कार्यक्रम मांय केंद्रीय नवीन अर नवीकरणीय ऊर्जा मंत्री प्रल्हाद जोशी कह्यो के देश मांय ऊर्जा उत्पादन मांय लगातार बढोतरी व्हे रही है। श्री जोशी कह्यो के ऐड़ी मशीनां ऊं मोटी तादाद मांय घरां ताई नवीकरणीय ऊर्जा पूगायी जा सकेला अर विकसित भारत बणावण रो संकल्प पूरो व्हे सकेला।

-----

000

बिहार रा राज्यपाल आरिफ मोहम्मद खान आज जयपुर रा राजभवन मांय राज्यपाल हरिभाऊ बागडे सागे मुलाकात कीनी। ई दौरान दोन्यू राज्यपाल न्यारा-न्यारा मुद्दां माथे बातचीत कीनी। लोकसभा अध्यक्ष ओम बिरला अर राज्य रा संसदीय कार्य मंत्री जोगाराम पटेल ई आज राज्यपाल श्री बागडे ऊं मुलाकात कीनी।

000

भारतीय जनता पार्टी नेशनल हेराल्ड मामला ने भ्रष्टाचार अर धोखाधड़ी रो मुद्दा बतायो है। पार्टी रा आला नेता अर केंद्रीय मंत्री हरदीप सिंह पुरी प्रवर्तन निदेशालय री कार्रवाई पाछे कांग्रेस रा विरोध प्रदर्शन री आज नई दिल्ली मांय आलोचना कीनी। वे कह्यो के ई मामला मांय प्रवर्तन निदेशालय री मौजूदा जांच कोई नुवी बात नी है अर ओ मामलो केन्द्र मांय भाजपा रा राज ऊं पैली साल 2012-2013 मांय सुरू व्ह्यो हो। श्री पुरी आरोप माण्ड्यो के ई मामला मांय करीब दो हजार करोड़ रुपया री संपत्ति महज 50 लाख रुपया मांय लीरीजी। ई मामला मांय कांग्रेस रा नेता सरकार माथे जांच एजेन्सी ई.डी. रो बेजा इस्तेमाल करण रो आरोप माण्ड्यो। ई.डी. री कार्यवाही रे खिलाफ प्रदेश मांय ई केई ठौड़ां कांग्रेस पार्टी री ओर ऊं धरना-प्रदर्शन करी ज्या। ध्यानजोग है के प्रवर्तन निदेशालय ई मामला मांय कांग्रेस रा आला नेतावां सोनिया गांधी अर राहुल गांधी रे खिलाफ आरोप पत्र दायर कीनो है।

000

सुप्रीम कोर्ट वक्फ संशोधन कानून 2025 रा बारा मांय केन्द्र सरकार ऊं सात दिन री मियाद मांय जवाब पेश करण सारू कह्यो है। अदालत री मुख्य न्यायाधीश संजीव खन्ना री अगुवाई वाली पीठ ई कानून री संवैधानिक वैधता ने चुनौती देवण वाळी अर्जियां माथे सुणवाई करता थकां ओ हुकम दीनो। वक्फ कानून री धारा 9 अर 14 रा तहत केंद्रीय वक्फ काउंसिल अर राज्य वक्फ बोर्ड मांय आगला हुकम ताई कोई नियुक्ति नी करी जावेला। ई सागे ई आगली सुणवाई ताई किण ई वक्फ संपत्ति ने गैर-अधिसूचित नी करी जावेला। अदालत केंद्र ने वक्फ कानून, 1995 मांय लारला दिनां करी ज्या बदलाव री वैधता ने चुनौती देवण वाळी अर रोक लगावण री मांग करण वाळी अर्जियां माथे जवाब दाखिल करण रा हुकम दीना। ई मामला मांय आगली सुणवाई 5 मई ने व्हेला।

000

जगद्गुरु रामानन्दाचार्य राजस्थान संस्कृत विश्वविद्यालय रो सातवों दीक्षांत समारोह आज जयपुर मांय राख्यी ज्यो। जळसा मांय राज्यपाल हरिभाऊ बागडे अर लोकसभा अध्यक्ष ओम बिरला ई शिरकत कीनी। ई मौके श्री बागडे कह्यो के संस्कृत भाषा संस्कृति अर संस्कारां री जननी है अर इण ने बचावण सारू भेळी कोशिसां करणी व्हेला।

राज्यपाल संस्कृत ग्रंथां रे जरिये भारत री ज्ञान परम्परा ने आगे बधावण बाबत् कह्यो। वे विद्यार्थियां ऊं विश्वविद्यालय मांय पौधा रोपण सारू ई कह्यो। कार्यक्रम मांय लोकसभा अध्यक्ष ओम बिरला संस्कृत भाषा ने जनता ताई पूगावण माथे जोर दीनो। श्री बिरला कह्यो के महापुरुष भारत री संस्कृति अर ज्ञान परंपरा ने संस्कृत भाषा मांय ही रची ही। लोकसभा अध्यक्ष कह्यो के इण रा वैज्ञानिक पहलू ने नुवा नजरिया ऊं देखण री जरूरत है।

-----

कार्यक्रम मांय शिक्षा मंत्री मदन दिलावर संस्कृत ने दुनिया री जूनी भाषावां री सूत्रधार बतायी।

000

राष्ट्रीय पोषण पखवाड़ा रा तहत प्रदेश मांय न्यारा-न्यारा कार्यक्रमों रे जरिये महिलावां अर बच्चां ने पोषण रा बारा मांय जाणकारी दी जा रही है। 8 अप्रैल ऊं चाल रह्या ई पखवाड़ा रा तैत आंगनबाड़ी केन्द्रां मांय पौष्टिक आहार लेवण, टीका लगावण अर स्वास्थ्य री देखभाल रा बारा मांय

जाणकारी दी जा रही है। डीग जिला री बाल विकास परियोजना अधिकारी बतायो के कुपोषण आगो करण सारु ओ पखवाड़ो खास पहल है।

000

प्रदेश रा केई हलकां मांय आज ई ज़ोरदार तावड़ो पड़्यो अर कठे-कठे लू बाजी। ज़बरदस्त गर्मी अर लू रे कारण जिन्दगी माथे असर पड़्यो, हालांकि दोपहरां पाछे कुछ जिलां मांय हल्की बिरखा व्हेवण ऊं गर्मी ऊं थोड़ी साता मिली। आज ई जोधपुर अर बीकानेर संभाग मांय कठे-कठे अधिकतम तापमान 44 डिग्री सेल्सियस ने पार कर ग्यो। चूरु मांय आज तेज तावड़ा रे कारण लोगां री आवाजाही कम रही। जैसलमेर मांय पड़ रह्या ज़ोरदार तावड़ा ने ध्यान राखता थकां सगळी सरकारी अर गैर सरकारी स्कूलां मांय 8वीं कक्षा ताई रा विद्यार्थियां सारु स्कूलां मांय भणार्ई-लिखार्ई रो बगत संवारे साढे सात ऊं ग्यारह बज्यां ताई कर दियो ज्यो है। पाली मांय जिला कलेक्टर मनरेगा रा तैत चाल रह्या कमठाणां माथे काम रो बगत संवारे छह बज्यां ऊं दोपहरां पाछे एक बज्यां ताई कर दीनो। ई बीचे भरतपुर अर कुछ जिला मांय आज संवारे बादळा मण्ड ग्या। मौसम केंद्र जयपुर रे मुजब आज कोटा, अजमेर अर जयपुर संभाग मांय आंधी चालण अर हल्की बारिश रा आसार है।

000